



# V. Nouvo Vizyjon

Newsletter - Vol. 20 Nimero 14 (13 Oktob 2011)

## Lopozisyon i Pli Solid ki Avan

**S**iporter Lopozisyon dan Sesel in ganny en nouvo lafors letan rezilta eleksyon in ganny anonse. Nou'n war klerman ki nou en lafors vreman solid, e ki sa lafors pe kontinyen ogmante malgre tou bann lobstak ki ganny met devan nou pou dekouraz nou. Seselwa pe montre ki dous-dousman zot pe vin pli determinen e ki byento nou pou briz tou sa bann baryer ki devan nou pour nou reklanm en Sesel vreman lib e demokratik. Lopozisyon i vreman solid, e nou pou debout lo kote tou Seselwa e defann zot ek nou pei.

### SNP i siport mouvman Lopozisyon

Dan sa kanpanya boykot, SNP ti zwenn ansanm avek NDP ek Mr. Boullé pou ankouraz Seselwa pou swa reste kot zot oubyen desann e gat zot vot. Ansanm nou'n ranport sa konba e nou'n fer gouvrenman ek lakominote enternasyonnal konnen ki nou serye e nou pa pou les personn zis zve avek nou. Sa rezilta in montre ki sa stratezi byen kalkile in marse. Se nou pei Sesel ki'n sorti gran venker dan sa eleksyon. Konklizyon ki tou dimoun, spesyalman Mr. Michel ek son gouvrenman i bezwen konpran se ki Seselwa i kapab debout for letan i neserer. Pour nou drwa nou pou fer li.

### SNP i siport proses demokratik

Rezilta sa eleksyon in osi montre ki apre plis ki 18an dan en sistenm multi-parti, nou ankor annan en long semen ver vre demokrasi. SNP, ankor enn fwa i donn son sipor total tou son bann partner dan lopozisyon pour nou anmenn sa lalit dan sa proses demokratik. Nou bezwen debout e rod bann meyer lalwa ek pli bon pratik pour nou fer progres. Nou pou debout lo kote lepep Seselwa e fer sir ki nou pei ek nou pep i ganny sa ki meyer. Napa plas pour medyokrite dan nou demokrasi.

### Debout for pour Sesel

Nou lans en apel pour tou dimoun ki'n toultan donn nou zot sipor pou debout for. Nou pe regard sa lavenir dan en fason serye e fodre ki nou met sa laplenn nivo. Napa plas pour diskriminasyon ek lapreferans dan nou pei. Napa lanperer ek senyer dan nou pei ki kontrol nou lavi ek nou lavenir. Sa pei i pour nou, e ansanm nou ava desid son desten. Parey toultan nou dir, 'Sesel i pour Seselwa!' Savedir ki nou tou nou annan par ladan, e nou pa pou les personn pran kontrol nou lavi. Nou pou reste met nou desten pour touzour.

### Nou lalit i kontinyen

Depi 1977 i annan dimoun ki pe lite pour nou ganny lademokrasi dan nou pei. Lezot in zwenn sa lalit pli tar, e ozordi i annan nouvo dimoun ki pe montre determinasyon e pe vin devan pou donn zot lafors pou fer nou pei avans devan. Nou bezwen tou dimoun pou reisi dan sa lalit. Nou bezwen tou lide pou nou rod meyer stratezi. Nou ankouraz ou pou vin devan. Si nou pa fer li pour nou pei ozordi, nou pou retourn an-aryer. Ansanm, annou montre nou determinasyon, e ansanm nou ava ranport en vre laviktwar pour Sesel.

## Konvansyon SNP: 20 Novanm

**N**ou annan gran plezir pou anons avek tou nou manm ki **Konvansyon parti pou fer le 20 Novanm dan lasal Sant Konferans Enternasyonal apati 3pm. Sa i en konvansyon tre enportan e nou demann tou manm pou fer en zefor spesyal pou asiste.**

Pandan sa konvansyon, parti pou elekte son Komite Ekzekitiv. Nou pou elekte Party Leader, Sekreter Zeneral, Trezorye, 2 Asistan Sekreter Zeneral, 2 Asistan Trezorye ek 10 manm Komite Ekzekitiv. An-plis ki sa, nou pou osi prezant bann kont parti, apwent en Oditer, e tras bann gran lalinny nou parti pour lavenir.

Deza nou pe envit tou bann manm pou renouvle zot 'membership.' Zot kapab rantr an-kontakt avek bann reprezantan distrikt oubyen kot biro limenm pour zot kapab fer sa. Fer li o-pli vit posib.

Nou pe deza prepar form pour ki manm i kapab fer nominasyon pour bann diferan pozisyon. A-parti semenn prosenn, zot pou kapab kolekte en form ki zot pou bezwen retourn kot biro avan le 7 Novanm. Lo sa form zot ava ganny tou leksplikasyon ki zot bezwen fer pou nonm en dimoun dan neport pozisyon.

Konvansyon SNP i en fason demokratik kot parti i elekte son bann dirizan ek son Komite Ekzekitiv. Alor sa i ou sans koman en manm SNP pour ou fer tande ou lavwa lo ki direksyon ou tya kontan parti i ale dan lavenir. Ou kapab osi met ou non koman en kandida.

Fodre ki nou tou nou debout for pour lademokrasi dan nou pei. Nou lalit koman en parti politik in toultan solid. Parey nou moto i dir, '**Nou pa pou zanmen les tonbe.**' Alor nou donn zot randevou Dimans le 20 Novanm kot ICCS a-parti 3er apremidi.

# SPPF i zet son pti baba

Seselwa in swiv sa konser politik byen pre. Sa zafer taye pou form en parti politik zis pou pran par dan eleksyon pa'n desann byen ditou avek nou pep. Dimoun in war byen ki sa ti zis en mannev pou donn kredibilite sa eleksyon e fer krwar ki Sesel i annan en demokrasi. Parti Lepep ti swete annan en lopoziyon karikatir dan Lasanble. Zot lakoler i kont Ramkalawan. Me la ki zot plan pa'n marse, nou war ki deza zot pe komans oubli sa enn ki zot tya pe servi. Sa i tipik SPPF/Parti Lepep. Nou ti krwar serten i kann sa leson, me malerezman pour serten faver, nou war dimoun ki pare pou vann zot nanm. Pli tar zot ava konnen.

Premye aksyon ki montre nou bann-la pe rod koup sa lakord i konsern kes devan lakour. Nou tya ekspekte ki Parti Lepep li osi, i tya met en kes pou konteste lafason ki Komisyon Elektoral in fer son travay. Me ki nou war? Zot pase trankilman e zot nonm zot 6 manm proporsyonnel e les David Pierre al konbat li tousel. Eski sa pa montre nou en leson?

Parti Lepep i annan en lot fason pour li detri ou: I donn ou lenportans e fer ou gonfle zis pour li apre zet ou kompletman. Se sa lot keksoz ki pe arive. Zot envit Pierre kot bann MNA pe pret serman, e li i desann nennen ouver. Me sa i zis en zes. Zot in fini pran li koman zot pti toutou, akoz zot konnen ki

manner zot kapab servi li. Pli tar ki nou pou tande ki pou arive. Sa i apel imiliasyon.

Seselwa in fini konpran. Demann bann dimoun ki'n deza ganny servi e zot ava rakonte ki manner apre zot in ganny zete. Konbyen fwa eski David Pierre ek Jane Carpin menm in repet sa dan Lasanble Nasyonal dan zot bann diskour? Eski zot zorey pa ti tande sa ki zot labous tya pe dir?

Seselwa, SPPF/Parti Lepep i konnen ki zot plan in fel. Ozordi zot nepli bezwen PDM. Annou swiv byen e nou ava war ki manner en lot group dimoun i ganny zete apre ki zot in ganny servi.

Siporter lopoziyon, koste e annou debout pour vre demokrasi dan nou pei.

## Oli lafors Dalila ek Zida?

Dan labib Dalila ti trai Samson e fer li ganny son lanmor. Zida ti trai Zezi e fer li osi ganny son lanmor. Dan politik Sesel in annan son Dalila(Jane) ek son Zida(David) ki'n trai zot parti e esey touy lademokrasi. Sepandan lepep Seselwa in montre ki zanmen zot pou les sa arive. Le 1 Oktob, lepep ti dir kler ki zot pou les bann ki trai ater.

Lepep in prononse ki ni Jane, ni David napa zot sipor. Alor meyer keksoz ki zot devret fer se donn en lape dan zot nanm. David i devret fer sa ki i ti dir, savedir al

dan son biznes ek son fammiy, spesyalman la ki Paris in ne, e Jane i devret servi son larzan pou fer son flat parey son plan.

Me selman dimoun i anvi konnen oli sa gran sipor ki sa 2 dimoun ti dir zot annan? Jane ti koz labous plen letan i ti trai SNP e dir ki li in vot dapre son konsyans e lo non sa 1200 dimoun ki ti vot pour li. Oli zot sa bann dimoun ki sipoze kontan li personnelman?

David ti osi dir ki bann siporter SNP pe esper li retournen koman lider sa parti. Akoz zot pa'n elekte li alor? Laverite i kler. Alor 'Give us a break!'

## Miting Piblik

Lopoziyon i envit tou  
siporter pou asiste en miting

Dimans 16 Oktob

Beau Vallon kot

Propriete Sullivan

a-parti 3 - 6pm

Nou Tou Nou Pou La

Pour Menm Rezon!

## PAS PARTOU

### Lakle in perdi

Pandan sa dernyen kanpanny, Marie-Antoinette Rose, dan en fason tre arogan, ti vin lo SBC e dir ki serten dimoun i krwar letan zot ale, zot anmenn lakle demokrasi dan zot pos. I resanble ki pour premye fwa i ti koz en laverite. I paret ki lakle sez Lider Lopoziyon in perdi e la David Pierre i bezwen menm al esey rod sa dan lakour Konstitisyonnell, avek led Tiroz limenm. Parfwa pa tro bon koz gran labous avan ler akoz i vin vre. Zot ti menm koz lo gaspiyaz larzan akoz by-election Mt. Fleuri. Dir nou konbyen zot in depanse pour sa fo eleksyon?

### Herminie i mank Lopoziyon

Herminie ti pre pou pler larm krokodil akoz napa lopoziyon dan Lasanble. Son vre problem se ki i en 'bully' e la i pou napa personn pou fer dominer avek e pou kriy 'out'. Lo nou kote nou krwar olye apel li 'Speaker' nou devret apel li 'Miss' akoz i pli parey en ansenyan dan P1. Sanmenm 'Nouvo Lasanble'?

### Veteran ki kontrole

Bann zenn ek bann ki pa tro zenn in fini ganny en nouvo apersi lo lafason ki zot parti i fonksyonnen. Se zis bann veteran ki'n ganny pozisyon e dan sa demars lager pozisyon, menm Wilby Lucas in pas ansipanpan. Sa i vreman mal. Avoka in ganny zet dan 'compost'. Potter i araze akoz i pa'n vin Anbasader e Deko i fristre akoz i pa'n ganny

plas Potter. Sel dimoun ki kontan se Pool. Lepep pe veve pou war ki manner sa swadizan Lasanble i fonksyonnen. Nwa gard zot enformen. Pa trakase.

### Ladan maler, pa ladan, maler menm

Ki nou pou ganny en konpran avek David Pierre ek Jane Carpin. Zanmen nenport ant zot in ganny en eleksyon. Me gras a SNP, zot tou lede zot in ganny tit Onorab e zot in gout Lasanble. Pierre ti debarke limenm san personn pous li. Carpin ti lev son ledwa e ddismiss son lekor. La aprezan ki tou lede i deor, zot in esey lager pou reantre ladan ankor. Lepep in dir zot 'sorry.' Zot pe debat menm pou esey reantre ladan. Seselwa in war ki sa bann zans in 'lost.' Nou bezwen en nouvo sanson avek tit '*ladan maler, pa ladan, maler menm!*'

# SNP - Commitment to Democracy